

棗強縣志卷第十二

陽湖楊元錫

同纂

蕭縣任銜蕙

循政略

循政之可考者前明知縣見通志及舊志所載列祀名宦者五人洪武初有李源清閩縣人幹濟有爲當兵燹之後民始歸附田蕪不治源清百計經營地闢民富壇廟學校創建一新規模宏遠矣成化間有姜昂字恒頰壬辰進士太倉人也蒞任時承饑饉之餘悉心撫字賑貧窮均賦役止橫歛決滯訟不一年民皆向善無訟爭者曰行其所無事歲旱有禱輒應連歲豐稔荒蕪者皆

棗強縣志卷十一

循政略

一

墾闢游惰者皆力農流移者皆復業熙然登上理矣又大修學校置祭器進諸生朔望講書義季考公勸懲至若修公署吏舍城東門城隍廟泊山川社稷諸壇百廢具舉一無所病於民鄰郡饑民有流移至者煮粥濟之全活不可勝計時飛蝗蔽天棗邑獨不爲災欽取授御史累官都御史正德初有徐讚字朝議浙江永康人宏治乙丑進士知棗強興學課農弭盜平獄當逆瑾扇虐時偵事者絡繹人皆失措讚毅然不爲動縣中有其黨怙勢不悛則示之以法俾不犯斯又人之所難者三載入爲監察御史歷官侍郎旣去人思之不置立祠祀之有段豸字世高山西澤州人占籍錦衣衛宏治壬戌進

士正德庚午由給事中以骨鯁左遷棗強知縣博學強記聲績偉然辛未畿內盜起黨以萬計攻掠州邑棗當眞定河間之衝無險可守城舊且圯復無戍卒豸激發忠義築葺樓櫓措施甫定賊自冀州涉河七月八日薄城下豸親執桴鼓賊兵三進三却殺賊二百餘首領一賊怒攻圍益急城陷豸被傷猶瞋目攘臂大呼殺賊赴水死三日典膳姚玘收其屍膚中一鎗矢沒數羽肘猶繫縣印焉事聞贈太僕少卿廕其子宗文爲錦衣百戶隆祀於祠昭世勸也萬厯初有南憲仲號次原渭南人甲戌進士是年冬莅任實心行政清查地畝得三百餘頃開墾荒地幾二千畝撫流移復業者四百餘家修城

垣興學校廣儲蓄以備賑貸鋤強暴以安善良迺以積勞致疾卒於官士民如失怙恃焉斯皆諸令中最賢者也舊志所載明知縣有循政可誌者凡三十八人洪武間有趙禮政治宜民永樂間有盧誠守城有功天順間有周繼歷城監生練達事體名譽著聞成化間有史瑛稷山進士立心正大耿介無私修學宮振士習陞監察御史宏治間有應傑應州舉人吐茹適中間閭不擾歷五年門無私謁陞戶部主事有張環絳縣人宏治癸丑進士才識高邁寬猛適宜重修儒學殿廡砌垣牆四百餘丈置祭器千八百件有王宗績山陰舉人愛民禮士正德間有張文淵通許進士時賊勢猖狂修城外堤以

防禦民永賴之有高福陳留舉人坦易公平嘉靖間有
陳言江都舉人土信民安陞通判去有蘇文南陽舉人
寬厚和平轉國子監助教有李天成洛陽舉人才器超
卓政治整飭有文集行世有李崇德臨清舉人明練有
爲車駕南狩以供億失序免士民惜之有蘇烈清源舉
人平易爲政體悉人情調元氏民送之不忍別有杜永
昌洛陽舉人愛民造士有張銀翼城舉人敷政明恕修
城有功有羅廷唯字貫溪永川進士學問閎博吏治精
明懸金購賊以靖四境創纂邑志文獻有徵陞監察御
史去有楊九韶餘姚人嘉靖癸丑進士蒞任當災沴之
後招徠流徙賑恤困窮懲猾役實倉廩斷事一程於理

務得其平一時稱神明焉邑苦盜設保甲令自爲檢舉
間有不逞豪猾收捕無遺甫暮年以憂去民思之不忘
建祠祀之有熊秉元豐城進士才識警敏事紛至悉解
人一見卽不忘歲大稔賑救多方饑民全活移歛縣去
有趙輔錦衣衛舉人慈祥樂易惜被誣罷有李學詩字
子興安陽進士操持廉潔實心實政不事粉飾有商鹽
欲求給散託津要先容面叱之曰有例在我必不徇情
以厲我民凡有興作豫計所需喻之民吏胥不得科擾
陞監察御史巡兩淮鹽歷大理寺丞隆慶間有王淑陵
陽城人嘉靖乙丑進士坦夷寬裕先撫字而後催科視
民事如已事興除必力陞大理評事民有事都下者視

之如子曲爲之所民益愛戴之歷四川參政有許光大號致齋安陽進士廉而有爲陞戶部主事歷通政司參議萬厯間有徐鳴鶴杞縣進士不矯激以近名庶政畢舉措注皆宜行取御史有石岩益都進士發摘如神不假刑威里書自首詭地三百餘頃聽訟片言立折雖積胥不能一售其奸乃枉被劾罷惜哉有郭維寧字德甫祥符人萬厯己丑進士恩威交鬯續修邑志陞戶部主事有王階雲南後衛舉人安雅不佻節用恤民陞橫州知州有戴九元號元趾新昌人萬厯甲辰進士明察而不苛清欺隱地千餘頃減逃戶千餘丁教化大行治行稱最調臨安民泣送於城南大營堡又十餘年民於泣

別處建戴公亭誌不忘也有魏廷相號卿雲嘉善人萬厯甲辰進士除歲徵貼馬之苦免紳士食鹽之稅置櫃二十令輸糧者自投遂爲成法陞監察御史有毛尚忠號誠菴嘉善人與魏廷相同鄉同舉進士相繼爲棗強令勤於吏治篤於文行興學校課諸生延及齊民皆知向學陞都察院經歷民立魏毛二公祠有鄭陞號龍嶼同安人甲辰進士約已便民興賢造士陞刑部主事有祠祀有王鶴齡號仁齋平陸人萬厯丁未進士莅任時值歲大旱道殣相望盜賊搶奪商旅不行鶴齡下車虔禱卽雨越數日又大雨多方拊循嚴保甲謹偵堠盜賊屏息民賴以安法立事治百廢具舉越歲遂大有年陞

刑部主事民立祠以祀有楊呈秀華陰進士有治才陞南戶部主事有喻思恂榮昌進士治稱公廉陞監察御史去民立祠祀之天啟間有陳三重號振寰靈璧人壬戌進士知隆平有政聲調棗邑公而能斷剖決若流吏畏民懷陞兵部武庫司主事立祠祀之崇禎間有劉作霖洛陽進士兩任棗邑勤於政理有王士英興化進士端方嚴明人重犯法修濬城池民不見勞以治行聞調真定有沈戩穀德清進士有才名陞戶部主事斯俱有善政於民雖無赫赫名而未可泯沒者也

國朝知縣有循政者順治初有劉顯名廣寧貢監息事寧人治行著聞陞監察御史有李恩光洛陽進士順治三

年任勞心撫字不務煩苛調知沅江有張學仁奉天貢生順治四年任平易近人陞道州知州有蕭維模景陵進士順治九年任才幹英敏聽斷如神惜以憂去有張先基廣濟進士順治十二年任初下車覽獄冊見擬辟者十有八案力請恤刑使者改爲矜疑賴以出者十二三丙申 大兵過棗有兵丁爲邑民趙甲毆死趙潛遁將兵者欲歸罪邑令趙從二百里外奔首曰殺兵丁者我也柰何畏罪而奪一邑之慈母其感人之深至就死不顧如此惜以失察逃人罷有張鳳起翼城進士順治十三年任政肅守廉豪猾屏跡陞御史有何之圖會稽監生順治十五年任興學造士飭武備以弭盜賊免株

連以寬厲禁陞邳州知州有胡夢龍宣城貢生康熙三年任政治可觀續修邑乘有吳三錫嘉興進士康熙十二年任與民休息胥役無敢爲奸在任五載陞中書去繼之者爲董廷榮鑲黃旗監生時值旱饑捐俸賑濟向例二十社各養馬一匹以備差役卽行禁革遇有急務設法供應至今德之有龔佳蔚仁和吏員康熙二十七年任清保甲均差役洞悉民隱因公降職時當炎暑百姓羣走都門籲留至有暍死中途而不悔者有韓昭鑲藍旗監生康熙二十八年任廉明嚴正遇有公務徵取車馬捐俸自備不令民知陞同知去有徐恪江陰拔貢康熙四十八年任政尚寬平辦理

南巡大差

聖祖仁皇帝御書黃庭堅詩以賜之誠異數也有單作哲高密進士乾隆十五年任興修學校續纂邑志爲時所稱有郝璉奉天開原人壬戌進士乾隆二十年任守潔愛民事亦振舉有李文耀號芟裳福建清流拔貢乾隆二十年任初知束鹿多善政調棗強志操不改治稱公廉有李應虞字獻五東平州人戊辰進士乾隆二十九年任英敏有才識陞貴州州牧去有薛田玉字璞菴無錫進士由庶吉士改知容城調棗強乾隆三十四年任雅負才名莅任暮年民稱慈惠陞襄陽府同知去繼之者爲任公字損之號寓圃蕭縣人乾隆甲戌進士初知南

和署宛平補棗強自庚寅至甲午五載廉慎勤敏治行
爲一時最暇日集諸生於官舍授經請業常數十人父
老至今言知縣循政自劉公後無如任公者矣至於政
事之美不可殫述有尚書紀公所作傳載藝文錄中可
考也子銜蕙於嘉慶庚申亦爲棗強知縣有李憲宜海
陽貢生乾隆四十四年任爲政明恕斷事公允調知清
苑累官四川兵備道斯亦近年來有循政者也

元錫纂棗強志至循政傳而知善人有後也棗強知
縣宋元以前不能具考自明迄今縣令至一百四十
有六人而父子相繼者惟任氏蓋任公少負才望成
進士然僅歷宰五邑不克展其驥足而世多稱任棗
強從其治行最著者也公以乾隆甲午調山左越二
十六年嘉慶庚申令子復爲棗強令繼公之志風教
相同昔北齊鄭道昭父子並爲山陰令世云諸傳有治縣
歌南齊僧祐父子並爲山陰令世云諸傳有治縣

棗強縣志卷十一

循政略

七

譜者若合符節非爲善者有後乎
哉嘉慶癸亥四月十日楊元錫識

儒學教諭則明有江淪正統十四年任彭澤舉人有文
名後家於棗成化間有潘偉莆田舉人敷政寬柔多所
成就宏治年有馬良富陽人謹飭有氣節有許效中莆
田舉人學行俱優善於造士有任瑾會稽舉人工詩辭
通典禮典陝右文衡正德中有張文錦濰縣舉人質直
嚴肅訓誨有方嘉靖間有何子顯福建舉人雅有文采
典河南文衡有李彥新蔡人善爲文勤於教多士愛慕
有昌應會莆田舉人督士會業詳於品藻辛酉典陝西
文衡陞廣宗知縣隆慶間有牛沈裕葉縣舉人蘊藉夷
曠飭躬作人士論雅重之陞吏部司務萬厯間有程繼

志浮梁舉人老成淳謹生儒愛戴有馬一廉安陽舉人能文辭典貴州文衡有胡來順黎平舉人博學多文有郭文衡剛介持躬陞刑部主事崇禎時有王景和雞澤舉人風流蘊藉陞階州知州有高山斗陝西舉人嚴氣正性多士凜爲典型陞高陽知縣

國朝則有雷湛通州舉人順治八年任博聞強識品藻不爽中乙未科進士有徐兆極大興舉人順治十二年任愷悌作人陞岳陽知縣有李賀滿城舉人順治十四年任立社衡文無間寒暑以疾歿於官有曹不爭贊皇舉人乾隆八年任教課有方能振興學校修建明倫堂尊經閣士林咸重之有劉鐸固安舉人乾隆五十三年任

和平樂易與物無忤尤勤於訓迪云

訓導則明隆慶年有張琦翼城人謹飭正直善於作人崇禎初有王鑑文安人穆然古處人仰楷模

國朝順治初有李如桂奉天人宅心醇粹藹然可親康熙年有陶彝字敏齋大興廩貢好學工詩諸生執經問難講解明晰後中已卯舉人庚辰進士官至掌河南道監察御史雍正年以病遷居棗強遂入縣籍焉夫師道立則善人多故詳序之於此

縣丞則通志所載祀名宦者明正統中有楊琛由吏員任棗強典史清勤儉約教民樹畜貧不能婚葬者資給之後陞縣丞署縣事食知縣俸知縣員缺久不除歷任

二十一年終始不渝及卒士民如失父母因占籍棗強子孫衣冠濟濟遂成名族舊志所載宏治間有田智愛民重學嘉靖間有董應詔平定歲貢克謹官箴學問亦裕萬厯間有盧蕃德州衛監生才幹明敏操守廉介陞遼東衛經歷有賴萬昌武陵儒士莊雅有度陞赤州衛經歷有張名世馬邑拔貢洞達通敏丰采稜稜累陞薊州監軍道有江萬秋卽墨貢生端潔寬和陞興濟知縣有陶爾秉陝西選貢多學能詩以署衡水縣註誤改補温州經歷有張守廉仁厚和平陞聊城知縣去

國朝則有趙長慶南充貢生有才幹以署縣事註誤人頗惜之有潘仁仁和監生有袁丕基吳縣監生有楊繼椿臨汾貢生皆佐治有爲陞知縣去者也

棗強縣志卷十二

循政略

九

典史則明有楊琛循政卓然可觀者其他則舊志所載成化間有于晟重修城垣宏治間有陳宏祥符人有才有守嘉靖間有曹光本高安人廉潔端雅布衣蔬食公餘灌園以供日用乃縣尉中之絕無者萬厯間有黃桂芳山陽人從政勤慎陞黃陂縣主簿天啟時有祝有壽蒞事清謹有龐懷登贊理勤敏

國朝則有周翽會稽人乾隆三十七年任才幹明敏人民愛戴至今稱道不衰此後蓋闕如矣